

Kingusinnerpaamik UKA 2019-mi Majoriaq pillugu naliliinermik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Naliliinermi nassuiarneqassaaq innuttaasut ilinniarnissaannut sulilernissaannullu piareersaasarnissaminut Majoriap siunertani qanoq naammassitigisimaneraa. Naliliinermut ilanngullugu aamma maannamut misilittakkat tunngavigalugit pitsanngorsaannissanut sipaarutissanullu siunnersuutit ilannguteqquneqarput.
(Inatsisartunut ilaasortaq Nivi Olsen, Demokraatit)

Akissuteqaat

Aatsitassanut Suliffeqarfimmullu Naalakkersuisoq

Aappassaaneernera

Aalajangiiffigisassatut siunnersuutip sukumiisumik suliarineranut Inuussutissarsiornermut Aatsitassanullu Ataatsimiititaliamut qujanaq. Inuussutissarsiornermut Aatsitassanullu Ataatsimiititaliap akerliusoqarani Majoriami angusat erseqqarissarnissaannik kissaateqarnera Naalakkersuisut assut iluarisimaarpaat.

Majoriamik nalilersuineq ”Suliffeqartitsinermit periusissiaq 2015 – Suliffeqarneq toqqissisimanartoq”-mik tamakkiisumik nalilersuinermit saqqumilaartitatu ilaasinnaannissanut Naalakkersuisut siullermeernermit akissuteqaammimi allannguutissatut siunnersuut saqqummiuppaat.

Suliffeqartitsinermit periusissiamik annertunerusutut nalilersuinermit Majoriamik nalilersuineq erseqqinnerusumik sammineqarnissaa siunnersuutip aappassaaneernissaanut Inuussutissarsiornermut Aatsitassanullu Ataatsimiititaliap isumaliutersuummini erseqqissaatigivaa. Taamaalilluni innuttaasut ilinniarnissaannut sulilernissaannullu piareersinnissaat pillugit Majoriap siunertaminik qanoq annertutigisumik naapertuutsineranik Majoriamik nalilersuinerup minnerpaamik qulaajarnissaa allannguutissatut siunnersuutip erseqqissaatigivaa. Nangillugu nalilersuinerup manna tikillugu misilittakkanik tunngaveqarluni pitsanngorsaatinut sipaarutinullu siunnersuutininik saqqummiussaqaarnissaa siunnersuutigineqarpoq.

Majoriami iliuuserisat sunniutaasa uuttortarneranni annertuumik sammisaqartoqarnissaa pillugu ataatsimiititaliap oqaaseqaataanut Naalakkersuisut isumaqataapput. Sapaatip akunnerani kingullermi suliffeqarfimmik suliassaqarfik pillugu ataatsimiititaliaq paasisitsiniaanermut ataatsimiinnermi peqataavoq, tassanilu sammisanut apeqqutilliinissamut periarfissaqarpoq. Ataatsimiinnermi Majoriap iliuuserisai pillugit kommunit nalunaarutigisaat tiguneqarlutillu

sunniutaasut uuttortarneranni ilaatinneqarsinnaaneratt pillugu Naalakkersuisut ataatsimiititaliamut ilisimatitsisimapput.

Majoriami iliuuserisat siamasissutut iluseqarput, innuttaasunullu tamanut, ilinniagaqalerlutik imaluunniit suliffeqalerlutik ingerlariaqqinnissaminut aqqummut eqqortumut nukissaqalersitaanissamik pisariaqartitsisunut neqeroorutit ipput. Tamakku pisarput ilitsersuinikkut, piginnaangorsaanikkut suliffissanillu innersuussinikkut, aammattaarli piginnaangorsaaqqinnikkut, suliffitsigut nikerartutigut aamma paasisaqarniarluni ingerlassatigut. Majoriaq tassaavoq innuttaasup ilinniagaqalernissamut suliffeqalernissamullu piareersimatilerniarneranut tunngatillugu innuttaasut pisortanut attaveqarnerannut katersuuffik.

Taamaalillutik suliffeqarfimmik, ilinniagaqarfimmik, isumaginnittoqarfimmik aamma ikiorsiisarnermik suliassaqarfiit nalilersugarinerisa ataqatigiissinniarnerni sammisat akimorlugit suliaqarneq Naalakkersuisut aallartisarsimavaat, tamakku ilaatigut iluarsaaqqinnermik suliap ingerlateqqinneranut tunngavissiissallutik.

Taamatut oqaaseqarlutik Inuussutissarsiornermut Aatsitassanullu Ataatsimiititaliami allannguutissatut siunnersuut Naalakkersuisut tusaatissatut tiguaat.